


**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVI No. 23
Disyembre 7, 2005
www.philippinerevolution.org

Editorial

Pamatukan ang wala untat nga kalakasan sang rehimeng Arroyo



Wala untat ang kalakasan sang pasista nga sapat nga si Gloria Arroyo. Sa kadamuon, kasunson kag brutalidad sang mga pagpamatay sa mga lider kag katapu sang mga progresibong organisasyon kag

sa kalapad kag kasingkion sang pagpang-abuso sa tawhanong-kinamatarung sang ordinario nga pumuluyo, ginapaluntad niya ang kugmat sang indi pagdeklarar sang layi militar. Ginatapna ang ano man nga pagpamatuk sa iya pagginahum, kag ano man nga paginsister sa kinamatarung sa atubang sang mapiguson nga mga polisiya ginalupig sang kamot nga salsalon.

Daw buhi ang ginakangil-aran nga pasistang diktador nga si Marcos sa persona ni Arroyo. Kon usisaon, halos nalampasan na sang paltik nga presidente ang nagtaliwan nga diktador sa kapintas.

Sa idalum sang diktaduryang Marcos, napuno ang mga presohan sang linibu-libo nga bilanggo pulitikal. Sa idalum sang rehimeng Arroyo, madamo gihapon ang ginahunong, pero mas madamo ang wala kaluoy nga ginapamatay.

Daw "indi magkuha sang bihag!" ang polisiya ni Arroyo sa pagpapas sa ginabilang niya mga "kaaway." Ginapadalagan sang AFP ang *death squad* sa nagkalain-lain nga bahin sang pungsod kag ginakasangkapan ang mga ini sa kampanya sang pangpulitika nga asasinasyon.

Ang mga pagpamatay kag pagpang-ipit sa mga sibilyan masami nga balos sang AFP kag PNP sa mga kasamaran nga naangkon nila sa kamot sang BHB kag sa ka-

**Mga tampok
sa isyu nga ini...**

Report bahin sa paglapas sa tawhanong-kinamatarung
PAHINA 3

Mga engkwentro sa Quezon
PAHINA 7

Ang paggamit sg *land mine* sg hangaway sg banwa
PAHINA 11

paslawan nila nga malutos ang hangaway sang banwa. Sa sobra nga kahuy-anan kag kainutilan, ginatunod sang AFP kag PNP ang mga ila pusil sa mga indi armadong sibilyan.

Duha ka adlaw makaligad nga nag-agum ang AFP sang daku nga kaswalti sa Calinog, Iloilo sadtong Nobyembre 19, wala kaluoy nga ginpamatay sang mga elemento sang 19th IB ang 10 ka mangunguma sa San Agustin, Palo, Leyte. Matapos man makaagum ang PNP sang mga kaswalti sa pagpang-ambus sang BHB sa Tiaong, Quezon sadtong Nobyembre 19, ginbomba sang mga eroplano kag gin-istraping sang militar ang mga komunidad sa Tiaong kag mga kaingod nga banwa, kag pila ka residente na ang ginkidnap kag ginpatay.

Nagaabot na sa 10,000 katao sa Quezon ang pwersahan nga ginpabakwit ukon napwersa maghalin bangud sa kabangis sang operasyon militar. Luwas pa diri ang 7,000 nga pamilya sa Aurora, Leyte kag Sulu nga napilitan magbakwit bangud sa pagpanghalit sang AFP.

Sining nakaligad lang nga semana, duha ka tagasakdag sang tawhanong-kinamatarung ang brutal nga ginpatay sa Ilocos Sur kag Abra.

Sila ang ika-11 kag ika-12 nga myembro sang mga progresibo nga organisasyon nga biktima sang pagpamatay halin lang sa katapusan sang Septyembre tubtub katapusan sang Nobyembre.

Tanan nga mga biktima mga indi armadong sibilyan nga ginwaslikan sang kaakig sang mga pwersa militar kag pasistang amo sini bangud sa pagpanguna sang mga progresibo sa pagbuyagyag kag pagbatu sa rehimeng Arroyo.

Umpisa nga magpungko si Arroyo sadtong Enero 2001, masobra na 260,000 indibidwal ang nangin biktima sang mga paglapas sa tawhanong-kinamatarung. Samtang nagadugay siya sa poder, kag nagabaskog kag nagalapad ang singgit para sa pagtapos sang iya pagginahum, labi

nga nangin desperado kag mapintas si Arroyo.

Patimaan ini sang labi na pagkahamulag ni Arroyo kag sang AFP sa pumuluyo kag kawad-on nila sang suportang masa. Bangud sa pagka-papet, garuk kag pasista, napaslawan ang AFP kag rehimeng Arroyo nga habigon ang paminsaron kag balat yagon


sang pumuluyo. Labi sila nga ginakangilaran. Sa pihak nga bahin, padayon na nagalapad kag nagadalum ang suporta sang pumuluyo sa rebolusyonaryong kahublagan.

Pero ang wala pili nga terorismo sang rehimeng Arroyo kag sang armadong haligi sini

ang mismo nagapukaw sa pumuluyo sa riyalidad sang pasismo. Ini mismo ang nagapadabdab sa ila kaakig sa berdugo militar kag sa reaksyunaryong amo sini. Isa ini sa mga pangunahon nga dahilan kon ngaa mabaskog nga ginahandum sang mas madamo nga pumuluyo nga mapahalina ang bulok, mapintas kag di lehitimo nga papet nga rehimen.

Ini man ang nagaduso sa nagadamo nga pumuluyo nga magbato, suportahon ang BHB bilang kaugalingon nila nga hangaway kag sundon ang dalan sang rebolusyonaryong pagbag-o.

Labi nga nagadamo ang gusto mag-entra kag maghatag sang suporta sa BHB kag sa pagpasulong sang armadong rebolusyon. Sa paglunsar sang mas madamo, mas dagku kag mas masunson nga mga taktikal nga opensiba, mabaskog nga mabunalan ang mga armadong gaway sang reaksyunaryong estado. Maka-amot ang BHB sa madasig nga pagpukan sang ginakangilaran nga rehimeng Arroyo kag matulod ang inaway banwa padulong sa mas mataas nga subhalintang sang estratehikong dependensiba. **AB**



Tuig XXXVI No. 23 Disyembre 7, 2005

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial	1
Pagpanghalit sg estado	
Report bahin sa paglapas sa tawhanong-kinamatarung 2005	3
Masaker sa Palo	5
Militarisasyon sa Baybay, Leyte	6
Mga taktikal nga opensiba	
Compostela, Kalinga kag CamSur	6
Mga enkwentro sa Quezon	7
Ang pagsiod sg "Hunter-Killer"	8
Sumbag kay Buan	9
Nagluha-buwaya ang AFP	10
Paggamit sg BHB sg <i>land mines</i>	11
Pagbalik ni Garci	12
Abono sa kampanya ni Arroyo	13
Balita	14

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas



Report bahin sa paglapas sa tawhanong-kinamatarung para sa 2005

Pinakamasingki pagkatapos sang layi militar

Labi pa nga nagsingki kag nagbangis ang rehimeng US-Arroyo sa paglapas sa nga tawhanong-kinamatarung sang pumuluyo subong nga 2005. Mas malapad nga kahalitan ang gindulot sang pasista nga bangkil ni Arroyo sa atubang sang wala untat nga panawagan para patalsikon siya sa poder, kag masingki nga krisis pangpulitika kag pang-ekonomya nga nagabay sa iya pagginahum. Ginpabaskog pa sang rehimeng Arroyo subong nga 2005 ang nasyunal nga kampanya sang pagpatay sa mga lider, aktibista kag suporter sang mga progresibong organisasyon kag partido pulitikal. Planado, sistematisiko kag magkaangot ang mga pagpatay sa desperasyon nga dugmukon ang progresibong kahublagang masa.

Ginpasingki ang militarisasyon sa kaumhan. Sa mga syudad, kadunungan sang wala untat nga pagbinutig kag pagtakup sa mga kasalanan ni Arroyo, wala preno ang mga paggamit sang tanan nga kasangkapan sang estado kag militar para busalan kag atakehon ang kahublagang anti-Arroyo.

Suno sa report sang KARAPATAN, may 874 kaso sang paglapas sa tawhanong-kinamatarung nga nagabiktima sang 99,011 indibidwal kag 14,302 pamilya sa 288 komunidad halin Enero tubtub Nobyembre 30. Ang 2005 ang pinakamasingki nga tuig sa paglapas sa tawhanong-kinamatarung sang pumuluyo pagkatapos sang layi militar.

Pagkidnap, pagpatay, masaker. Nagaabot sa 149 nga indibidwal ang pinatay sang rehimeng Arroyo sa 11 bulan sang 2005. Mas doble ang pagdamo sang mga kaso nga ini kumparar sa 63 kaso nga nalista

sadtong 2004. Ang 82 sa 149 nga biktima lunsay mga lider kag aktibista sang hayag nga demokratisong kahublagang masa. Ang 67 ginaspetsahan lang sang militar nga suporter, abyan ukon paryente sang mga Pulang hangaway ukon sang mga armadong Moro.

Malapad ang ginatarget sang mga pagpatay sang rehimeng Arroyo-mga lider kag katapu sang mga progresibong partido kag organisasyon, lider kag organisador sa mga komunidad, mangunguma kag mamumugon. Sa mga ginpatay, 28 ang lider ukon katapu ang Bayan Muna, 14 ang naghalin sa Anakpawis kag walo ang naghalin sa KARAPATAN. Luwas pa sa mga numero nga ini ang 10 nga mamahayag nga pinatay subong nga tuig, dugang sa 26 nga ginpatay halin 2001 tubtub 2004.

Sa halos tanan nga kaso sang mga makasaligni nga pagpatay, masami nga direktang imbolbado ang mga elemento sang militar ukon ang ila mga ginbuhian nga *death squad* kag grupong *vigilante*. Wala ni isa sa mga kaso nga ini ang nahatagan sang hustisya.



Tampok ang mga hitabo sa Central Luzon (CL). Nag-abot na sa 41 katawo ang ginpatay sa rehiyon nga ini. Sa una nga tunga sang tuig, ang mga pagpatay lunsay may kahilabtan sa welga sa Hacienda Luisita sa Tarlac.

Sang ginsaylo bilang pinuno sang 7th Infantry Division sa CL si Maj. Gen. Jovito Palparan Jr. sining Septyembre, gulpe nga nagdamo

ang numero sang pagpamatay kag naglapta ini sa iban pa nga prubinsya. Sa una nga duha ka bulan pa lang ni Palparan, 19 ang gilayon nga ginpatay sa CL. Sadtong Oktubre 26 kag 27, lima ang pinatay sang mga bayaran nga berdugo ni Palparan sa Bulacan, Tarlac kag Pampanga sa sulod sang 20 oras.

Sa Eastern Visayas (EV), sa idalum sang pagpamuno diri ni Palparan bilang hepe sang 8th Infantry Division, 36 ang pinatay halin Pebrero tubtub Agosto (kadam-an, katapu sang Bayan Muna).

Sa tanan nga ginpatay sa bugos nga pungsod, anum ang ginkidnap anay antes patyon. Isa sa tuman kabrutal nga kaso ang pagpatay sa mag-asawa nga Marivel kag Danilo Supena. Apat ka bulan nga mabdos ang anay lider sang League of Filipino Students sang Central Luzon State University nga si Marivel. Ginkidnap ang mag-asawa sadtong Oktubre 26 sang anum ka armadong lalaki nga naka-*combat boots* kag naka-*bonnet*. Nakit-an sadtong Nobyembre 20 ang ila mga bangkay nga nakasulod sa mga sako.

Kwarenta'y uno ang ginkuot kag indi na makit-an subong nga tuig. Trenta'y uno nga kaso ukon masobra katunga diri natabo sa EV sadtong nakadestino didto si Palparan. Kangot sini, ginkasuhan sa Ombudsman sining Disyembre 5 si Palparan sang mga paglapas sa tawhanong-kinamatarung. Ginpasaka ang kaso ni Rep. Satur Ocampo sang Bayan Muna base sa mga testimonya sang mga biktima sa CL, EV kag Mindoro kon sa diin siya nadestino halin 2001 tubtub 2004. Gina-insister man ni Ocampo nga suspendiron si Palparan samtang gina-imbestigar siya.



Nag-abot na sa 149 ang ginkuot kag nadula halin sang nag-alagad si Arroyo.

May pito nga kaso sang masaker sang mga inosente nga sibilyan subong nga 2005. Kadam-an sa mga biktima mga mangunguma nga katapu sang mga progresibong organisasyon ukon partido pulitikal. Pinakaulihi ang maka-ningingidlis nga pagpatay sa napulo ka mangunguma kag pagpilas sang 30 pa sa Palo, Leyte sadtong Nobyembre 21.

May 52 ka biktima man sang napaslawan nga pagpatay nga lunsay nakaangkon sang malubha nga igo sang bala kag *trauma*.

Militarisasyon sa kaumhan. Sa ngalan sang "gera kontra-terorismo" ukon mga operasyon nga "*counter-insurgency*," lapnagon ang paglapas sa tawhanong-kinamatarung. Labi nga nagsingki ang militarisasyon sa mga erya nga ginapatihan sang militar nga mabaskog ang Bag-ong Hangaway sang Banwa, Moro National Liberation Front (MNLF) kag Moro Islamic Liberation Front (MILF). Sa amo man, mabaskog ang militarisasyon sa mga lugar kon sa diin may mabaskog kag malapad nga pagpamatuk sa pagsulod sang dalagku nga kumpanya sang pagmina kag pagtroso. Nagakatabo man ang mga kaso sang paglapas sa tawhanong-kinamatarung sa mga baryo kon sa diin nagasulod ang Reengineered Special Operation Teams (RSOT) sang AFP.

Nadokumento sang KARAPATAN ang 23 kaso nga paggamit sang mga ekswelahan bilang kampo ukon temporaryo nga detatsment sang mga nagaoperasyon nga militar. Nakapekto ini sa 2,703 indibidwal kag 484 pamilya sa apat nga komunidad.

May ara man 15 kaso sang istraping, wala pili nga pagpalupok

kag pagpamomba nga nagabiktima sang 29,191 indibidwal ukon 5,210 pamilya sa 36 nga komunidad.

Ang pinakamadamo nga mga biktima sang pagpamatay, pwersahan nga pagkadula, pilit nga pagpabakwit, pagpamomba kag pagpalupok, tortyur, pagpamahog kag pagpangawat sang propyedad natabo sa pinakamilitarisado nga mga lugar sang pungsod.

Malala ang ginbatas sang mga taga-Sulu sa mga operasyon militar batuk sa MNLF, sadtong Pebrero kag liwat, sining Nobyembre. Mada-

mo sa mga inosente ang napatay ukon napilasan sa pumuluyo didto kag nakahalit sa mga propyedad nila bangud sa paghulog sang mga bomba kag pagpanganyon. Wala sang ano man nga pagpili ang mga militar sa mga sibilyan kag sa mga armado. Hungod man ginasamad sang militar ang ginakuhaan sang tubig kag mga eskwelahan didto agud labi nga pantuson kag pahugon ang pumuluyo sa pagsuporta sa MNLF.

Sa sulod sang una nga tatlo ka bulan ni General Palparan sa EV, linibu-libo nga mangunguma ang pwersahan napahalin sa 21 baryo sa mga banwa pa lang sang Samar kag nadulaan sang pangabuhian kag mga propyedad dulot sang wala untat nga militarisasyon, pagpamomba, pagpamintas kag pagpamahug sa tagabaryo.

Pagtapna sa kahlwayan sibil. Sa sobrang kulba ni Arroyo nga mapatsik paagi sa kahublagang masa, ginapaluntad niya ang mapiguson nga mga layi kag polisiya.

Ginagamit niya ang Batas Pam-bansa 880 (nga ginpasar sa panahon pa sang diktaduryang Marcos) agud ipatuman ang polisiya nga "*no permit, no rally*." Ginpaluntad umpisa sadtong Septyembre ang polisiya

nga "calibrated preemptive response" nga nagbunga sang mapintas nga pagbungkag sa mga rali. Ginhi-mo nga "no rally zone" ang palibot sang Malakanyang pati na ang Mendiola para idumili ang mga rali sa mga lugar nga ini nga makasaysayan ginahiwatan sang mga protesta sang pumuluyo.

Ginapahug man nga pasakaan sang kaso nga sedisyon ang mga partisipante sa Citizens' Congress for Truth and Accountability (CCTA) nga nagabista sa mga testimonya kag ebidensya batuk sa dinayaay sa eleksyon, paglapas sa mga tawhanong-kinamatarung kag kagarukan ni Arroyo.

Agud pungan ang pag-imbestigar sang Kongreso sa mga upisyal sang gubyerno kag pinuno militar nga imbolbado sa mga katuntuhan kag busalan ang mga gusto magtestigo kontra kay Arroyo, nagpagguwa ang Malakanyang sang Executive Order 464 nga nagadumili sa ila sa pagtambong sa mga pagbista sa Kongreso "kon wala sang hayag nga pahanugot ang Presidente." Angot sa pagpanaug sang di deklaradong layi militar ni Arroyo, padayon nga ginaduso sang rehimen ang EO 420 para sa pagpatuman sang National ID System, ang Anti-Terrorism Bill nga ginapaspasan para mangin layi sa masunod nga tuig kag isa nga ginahimo nga EO para sa deklarasyon sang *emergency rule*.

Detenido pulitikal. Padayon nga nagadamo ang mga bilanggong pulitikal. Lakip diri ang mga organisador sa mga komunidad, mangunguma, mamumugon, kababaihan kag mga bata. Sa subong, may ara nga 285 bilanggong pulitikal-18 sa mga ini, menor de edad. Lakip sa ila ang mga mangunguma nga nakigbato para sa ila kinamatarung sa duta, mga ginasuspetsahan nga katapu sang BHB, MNLF kag MILF ukon indi gani mga suporter nila. Kadam-an sa ila iligal nga gin-aresto. AB



Masaker sa Palo, Leyte

Napulo ang napatay kag 30 ang napilasan sang pangluthangon sang 20 tropa sang 19th IB ang isa ka grupo sang mga mangunguma sa San Agustin, Palo, Leyte sadtong Nobyembre 21. Walo pa ang iligal nga gin-aresto kag ginhunong sa Palo Municipal Jail.

Sadtong kaaganhon sang Nobyembre 21, nagapreparar ang mga mangunguma sa ululupod nga pagbungkag sang duta. Gin-annunsiyo nila ini sa mga kaingod nga barangay kag nag-imbatar sang mga katapu sang masmidya agud idokumento ang ila paghulag. Tanan-tanan 46 katao ang nakatipon sadto para sa aktibidad.

Malinong kag wala sa buot sila nga nagapangape sang hinali na lang sila ginpangluthang sang mga pasistang tropa sang AFP. Lakip sa gilayon nga napatay amo ang isa ka lola kag isa ka pito ka bulan nga nagabusong nga ginang. Ang mga nakadalagan ginlagas sang mga luthang. Ang mga pilason ginpangsipa sang mga pasista.


Agud pagguwaon ang mga napatay mga katapu sang Bag-ong Hangaway sang Banwa, nagbutang ang mga suldado sang mga daan kag samaron nga paltik kag shotgun, isa ka M16 kag mga "subersibo nga dokumento" sa higad sang mga bangkay. Ang mga ini ang ginpagguwa sang AFP nga kuno ebidensya nga mga gerilya sang BHB ang nakatipon didto.

Ginhimutig ni Richard Margallo, isa sa mga nakalibre sa masaker kag upisyal sang konseho sang barangay, ang akusasyon sang militar nga sila mga katapu sang BHB. Sa pagtestigo niya sa Citizens' Congress for Truth and Accountability (CCTA) sadtong Nobyembre 23, ginsiling ni Margallo nga wala sila sang iban nga dala kundi mga binangon kag tatlo ka *hand tractor*.

Ang napulo nga minasaker lunsay

mga mangunguma nga myembro sang San Agustin Farmer Beneficiaries Multipurpose Cooperative (SAFaBeMCo) nga sadto naghimo sang pagtilipon kaangot sang ila programa nga "Balik Uma". Ang "Balik Uma" kabahin sang ila paghimakas para sa duta kag pursigido nila nga ginasulong sa bulig sang Alang-alang Small Farmers Association (ASFA), partido nga Bayan Muna kag mga tagasakdag sang tawhanong-kinamatarung halin sa Concerned Citizens for Justice and Peace (CCJP). Tuyo sini nga matawhay kag ululupod nga balikan ang duta nga madugay na nga ginlaksam ni Pedro Margallo, isa ka lokal nga agalon nga mayduta. Gin-angkon ni Margallo ang duta bisan pa nakaklasipika ini nga duta pangpubliko kag bisan pa nga madugay na nga nagauma didto ang mga mangunguma. Ginkilala pati sang Department of Agrarian Reform ang kinamatarung sang mga mangunguma sa duta. Pareho sang ginasaligan, mabaskog nga ginapamatukan ni Margallo ang pag-insister sang mga mangunguma.

Ang masaker sa Palo pangaduha nga masaker nga ginhimo sang 19th IB sa Leyte. Ang 19th IB man ang yara sa likod sang Masaker sa Kananga, kon sa diin anum ka sibilyan kag tatlo ka *hors de combat* nga mga Pulang hangaway ang gintortur kag ginpamatay sadtong Abril 16, 2003 sa Kananga, Leyte. Wala pa masilutan ang



mga upisyal kag mga elemento nga responsable diri.

Sa tunga sang padayon nga pasistang kalakasan sang rehimeng US-Arroyo, nagapanawagan ang tanan nga biktima sang pasistang kalakasan kag bilog nga pumuluyo sang EV nga arestuhon, bistahon kag silutan ang mga upisyal kag suldado nga yara sa likod sang masaker sa Kananga kag Palo. Nagalanog ang ila singgit: Palayason ang 19th IB! Palayason ang bilog nga 8th ID nga amo utok sang tanan nga pasistang krimen sa rehiyon!

Nag-ani man sang mabaskog nga pagpakamalaut ang AFP kag rehimeng Arroyo halin sa mga progresibong organisasyon kag pumuluyo, mga mamahayag kag pati pila sa nila nga kadampig. Gilayon nga nagtawag sang imbestigasyon ang mga progresibong kongresista sa makangingil-ad nga krimen sang AFP.

Mabaskog nga ginakundenar sang Partido Komunista sang Pilipinas ang masaker. Nagpahayag man ang National Democratic Front-Eastern Visayas (NDF-EV) sang labaw nga pagkangil-ad kag kaakig sa pinakaulihi nga krimen nga ini sang AFP.

AB

Militarisasyon sa Baybay, Leyte

Isa ka bulan na nga ginaperwisyo sang masingki nga operasyon militar sang 43rd IB ang pumuluyo sa Baybay, Leyte. Masobra 500 pumuluyo ang nagbakwit sa Barangay Plaridel kag Barangay Maslog, Baybay, Leyte sadtong Nobyembre 1-2, sang gamuhon sang mga operasyon militar ang pagdumdum sang pumuluyo sang tradisyon sang Adlaw sang mga Patay.

Sa kamatuoran, sa sementeryo sadtong Nobyembre 1 ang mga residente sang duha ka sityo sang Barangay Plaridel kag isa ka sityo sang Barangay Maslog sang mag-ibwal ang inaway sa tunga sang mga pasistang tropa kag mga Pulang hangaway sang Mt. Amandewin Command.

Bangud sa kahadlok sa wala pili nga pagpalupok sang mga suldao, nagbakwit ang 91 pamilya pakadto sa sentro sang barangay. Masunod nga adlaw, indi maisip ang mga nagbakwit halin sa Barangay Maslog bangud mansig kadto sila sa nagkalain-lain nga lugar pagkatapos magamu sang padayon nga pasistang operasyon.

Sadto naman nga Nobyembre 12, ginbakol sang mga suldao sang 43rd IB sanday Boriano Limgas, Jimmy Alkosada kag Manvin Managbanag sang Barangay Igang kag pilit nga ginpaako nga sila mga katapu ukon tagasuporta sang BHB. Ginbakol man sanday Alfredo Tenarlo kag Pablo Barrientos sadtong Nobyembre 18.

Nagapadayon ang pagpang-ipit sang militar sa mga mangunguma. Hugot nila nga ginabantayan ang hulag sang mga mangunguma kada adlaw, gani bisan nagatrabaho, napilitan magdala ang mga mangunguma sang dokumento nga nagapamatuod sang ila pag-estar sa baryo.

Ginpakamalaut kag nanawagan sang imbestigasyon sa nasambit nga mga abuso ang Sangguniang Panlalawigan sang Leyte. AB



Mga opensiba sa Camarines Sur, Compostela Valley kag Kalinga



Siyam nga pwersa sang kaaway ang napatay kag anum ang napilasan sa tatlo ka separado nga opensiba nga ginlunsar sang mga gerilya sang Bag-ong Hangaway sang Banwa (BHB) sining Nobyembre kag Disyembre sa Camarines Sur, Compostela Valley kag Kalinga. Napulo'g isa man ka armas nga nagkalain-lain nga kalibre ang nakumpiska.

Sa Camarines Sur, ginsalakay sang BHB ang detatsment sang Philippine National Police sa Barangay San Miguel, Bato bandang 12:40 sang kaaganhon sining Disyembre 5. Nalutos sang BHB ang mga pulis kag naagaw nila halin sa detatsment ang anum ka M16 kag tatlo ka pistola pagkatapos sang pila ka minutos nga inaway. Napatay ang timlider sang detatsment nga si SPO3 Elmer Cangayo. Tatlo pa ka pulis ang napilasan.

Sa Compostela Valley, tatlo ka elemento sang CAFGU ang napatay kag tatlo ka iban pa ang napilasan sang ambuson sang mga Pulang hangaway sa idalum sang Armando Dumandan Command (ADC) sang BHB sa Front 33 sang Southern Mindanao Region ang nagapatrulya nga elemento sang kaaway halin sa detatsment sang 72nd IB kag CAFGU sa Barangay Dalaguete, Montevista. Natabo ang lima ka minutos nga inaway bandang alas-10 sang aga. Duha ka M14 ang nakumpiska sa gilayon nga nagpinalagyo nga mga kaaway.

Sa Kalinga, tatlo ka suldao ang napatay sang ambusan sang mga Pulang hangaway ang nagapatrulya nga mga elemento sang 17th IB sa lindero sang Barangay Apatan kag Pinukpuk sa banwa sang Balbalan.

Bag-o sini, gin-atake man sang ADC sadtong Oktubre ang isa ka grupo sang mga armadong anti-komunistang panatiko sa lindero sang mga banwa sang Asuncion kag Montevista nga ginbuhi liwat sang 72nd IB. Duha ka panatiko ang napatay sa opensiba.

Samtang, ginahimutig man sang ADC sa isa ka pahayag ang ginapalapta sang AFP nga mga gerilya sang BHB ang nagreyd sa outpost sang DENR sadtong Nobyembre 22 sa Barangay Logdeck, Montevista nga ginkamatay sang duha ka sibilyan. Suno sa inisyal nga imbestigasyon sang ADC, isa ka manugtroso nga akig sa korapsyon kag ekstorsyon sang pila ka tinawo sang DENR ang may kahimuan sang pagsalakay. Gin-athag sang ADC nga lunsay lehitimo nga target-militar lang ang ginasalakay sang BHB, sandig sa CARHRIHL kag mga internasyunal nga kasugtan nahanungod sa gera sibil. AB



Mga engkwentro sa Quezon

Indi magnubo sa 25 pulis kag suldado ang napatay kag masobra 40 nga iban pa ang napilasan sa natabo nga mga engkwentro sa Quezon halin sadtong Nobyembre 19.

Nobyembre 19, Sabado, Barangay Bataan, Sampaloc. Ginharas sang mga Pulang hangaway ang pito-katawo nga yunit sang 76th IB nga nagapatrulya sa baryo.

Sa Barangay Labnig, Gumaca, isa ka elemento sang 76th IB ang napatay kag tatlo nga iba pa ang napilasan sa pagharas sang mga gerilya.

Nobyembre 20, Domingo, Barangay Lucasan, Tiaong. Alas 3:30 sang kaaganhon sang ginsita kag gilayon nga ginpalukpan sang mga nagapatrulyang pulis ang isa ka iskward sang BHB nga lulan sang isa ka sasakyan.

Lipod sa ihibalo sang mga pulis, kabahin lang ang nasambit nga iskward sang isa ka daku nga platun sa idalum sang Apolonio Mendoza Command (AMC) nga gilayon nga nagmaniobra kag nagbato agud magdependa. Isa ka elemento sang Tiaong PNP ang napatay kag apat nga iban pa ang napilasan sa inaway nga ini. Nakaagaw man diri ang BHB sang isa ka M16, isa ka kalibre .45 pistola kag mga bala.

Bandang alas-5 sang hapon, madinalag-on nga nakadepensa ang isa ka daku nga platun sang AMC batuk sa mga elemento sang 202nd Bde sang Philippine Army. Suno sa report sang mga residente, anum ka bangkay sang mga tropang militar ang ila ginhakot.

Nobyembre 21, Lunes, sa lin-



dero sang Barangay Lucasan kag Barangay Anastacia, Tiaong. Suno mismo sa pahayag sang mga upisyal militar sang Southern Luzon Command (Solcom), tatlo ka sulda ang napatay kag siyam nga iban pa ang napilasan sang ambuson sang mga Pulang hangaway ang mga elemento sang 2nd Infantry Division nga nagalagas sa mga gerilya sang BHB bandang ala-5:30 sang hapon.

Nobyembre 22, Martes, linderong sang Tiaong kag Candelaria. Isa ka madasigan nga ambus ang ginlunsar sang AMC batuk sa mga elemento sang 2nd ID nga naga-operasyon sa lugar bandang ala-5:30 sang hapon. Naglawig lang sang pila ka minutos ang lukpanay pero di magnubo sa tatlo ka militar ang gilayon nga napatay sa inaway nga ini. Nakapalayo na ang mga Pulang hangaway sang mag-abot ang nagtabang nga mga helikopter nga naghulog sang mga bomba sa lugar nga gin-away.

Samtang, sa Barangay Nagasinamo, Lucban, tatlo ka elemento sang 1st IB ang napatay sa pagpangharas nga ginlunsar sang mga

Pulang gerilya.

Nobyembre 23, Myerkules, Candelaria. Isa ka *misencounter* ang natabo sa tunga sang mga elemento sang Philippine Army. Naglawig sang isa ka oras ang inaway sang mga militar sa kapareho nga militar.

Nobyembre 24, Huwebes, Barangay San Pedro, Lopez, Quezon. Ginharas sang mga Pulang hangaway sang BHB-South Quezon ang Reengineered Special Operations Team sang 76th IB. Duha ka sulda ang napatay kag pila pa ang napilasan.

Samtang, natabo liwat ang isa ka *misencounter* kag isa ka engkwentro sa tunga sang BHB kag AFP sa Candelaria. Natabo ang *misencounter* sa tunga sang mga elemento sang 202nd Bde. Bandang tungang gab-i, nakaengkwentro naman sang mga Pulang hangaway ang mga elemento sang AFP sa isa ka tsekpoynt sa Barangay Mangilag. Isa ka sulda ang napatay diri kag tatlo ka iban pa ang napilasan.

Nobyembre 25, Byernes, Barangay Mabini, Mulanay. Duha ka elemento sang 74th IB ang napatay sang ambuson sila sang mga hangaway sang Maria Theresa de Leon Command sang BHB-South Quezon. Isa ka kalibre .45 kag isa ka 9mm



nga pistola ang nakumpsika halin sa militar.

Sa ila pahayag sa midya sad-tong Disyembre 6, nag-abot sa 18 suldado kag pulis ang napatay kag 35 napilasan ang gin-ako nga kaswalti sang hepe sang Solcom nga si Lt. Gen. Pedro Cabuay, Jr. sa mga inaway sa mga banwa sang Tiaong, Candelaria kag Sari-aya. Naggamit ang militar sang tropa nga brigada-kadaku, ma-baskog nga mga armas, APC, tangke kag mga helikopter. Mis-mo mga heneral sang Solcom ang nagdiriher sa mga operasyon mi-litar. Pero maisog nga ginpaslaw sang BHB ang ila mga pagpanala-kay.

Mabaskog nga demoralisa-syon ang natuga sang mga ina-way nga ini sa tunga sang mga elemento sang 2nd ID. Pamatu-od diri ang duha nga natabo nga *misencounter* sa tunga sang mga tropa militar sadtong Nobyembre 23 kag 24 kon sa diin pataratas nga nagpalupok ang nahadlukan katama nga mga suldado sa ila pareho suldado. Suno sa report sang mga residente, nag-abot sa anum ka suldado ang napatay sa duha ka *misencounter*.

Sa desperasyon nga kontra-hon ang demoralisasyon, gin-pagguwa ni General Cabuay nga napulo ka Pulang hangaway ang napatay sa engkwentro. Kina-hanglan pa nga ianunsyo ang paghatag sang premyo nga P10,000 sa sin-o man nga maka-tudlo sang bangkay sang sin-o man nga gerilya sang BHB.

Dugang pa sa mga ini ang mga kaswalti nga naangkon sang militar sa mga taktikal nga opensiba nga ginlunsar sang Ma-ria Theresa de Leon Command sadtong Nobyembre 10,16 kag 20.

AB

Ang pagsiod sa "hunter-killer" sa Panay

Gin-ambusan sang mga Pulang hangaway sa idalum sang Coronacion "Waling-waling" Chiva Command sang Bag-ong Hangaway sang Banwa (BHB) sa Panay ang ginapabugal sang Armed Forces of the Philippines (AFP) nga "hunter-killer" nga yunit sa rehiyon-ang gitingub nga tropa sang 1st Scout Ranger Battalion (1st SRB) nga ginapamunuan ni Lt. Col. Noel Buan kag sang 47th IB nga ginapamunuan ni Col. Mariano Perez, Jr.

Siyam ang gilayon nga napatay kag 23 ang napilasan sa ambus nga ginhi-mo sa Sityo Simadbad, Mambiranan, Calinog, Iloilo sadtong gab-i sang Nobyem-bre 19. Isa pa ka suldado nga malubha nga napilasan ang namatay sang ulihi.

Samtang, wala ni isa ka Pulang hangaway ang napatay ukon napilasan man lang. Samtang ginahimo ang "*hot pursuit operations*" sang mga tropa sang Task Force Panay (TFP), hilway naman nga nagahuway-huway ang yu-nit sang BHB. Yari ang report sang yunit:


Husto nga nakahanda ang BHB agud bunalan ang mga tropa sang 1st SRB kag 47th IB. Ila ka bulan nga ginpanilagan kag gintun-an sang BHB ang kada hulag sang mga tropa nga naga-operasyon agud makabisar sini kag matumod ang pinakamahina nga angot sini. Ginkabisar sang mga Pulang kumander kag hangaway ang kada saka-panaog kag liko at tiyog sang mga kalupaan agud ma-talana ang mga lugar nga pagahi-watan sang taktikal nga opensiba.

Sandig sa panawagan nga aga-won ang inisyatiba, naglunsar ang BHB sang sunod-sunod nga mga is-nayping, harasment kag pagsilut. Bangud diri, nagin labaw nga maha-

long ang hulag sang kaaway. Naga-sakay ang kaaway tubtub sa isa ka lugar lang kag nagalakat kag naga-tago sa mga kagulangan kon naga-palapit sa mga lugar nga ginaduda-han nila may presensya sang BHB.

Nagagamit sila sang mga sibil-yan nga *asset* nga nakamotorsiklo agud siguruhon nga "limpyo" ang mga karsada nga ila pagaagyan kag mga nakasibilyan nga militar nga nagalibot-libot sa lugar nga ila pa-gasudlon. Masunson ang ila mga *ro-ad security patrol* sa mga lugar nga ginaagyan sang ila salakyan kag mga suplay. Ginapatapas nila ang hilamon kag kahoy sa magtimbang nga kilid sang mga karsada nga gi-naagyan nila pasulod sa mga lugar nga ginaoperasyon, kag madakuan na ang ila pwersa kon nagapakita sa mga tawo.

Gintumod sang mga kaupod ang oras nga ginakamanubo ang pagka-alerto sang mga tropa sang kaaway: gab-i, madamu sila nga nagaululu-pod, kag nagapulì na sa ila kam-po. Ang lugar nga ginpili amo yad-





tong wala ginalauman mangin *ambush site*: patag, wala sang mga kahoy nga makubera luwas sa magagmay nga tubuhan nga mga isa ka gatos metros halin sa karsada, kag permi ginaagyan kag ginasyod.

Sa umpisa pa lang sang operasyon sang kaaway maid-id nga nagabantay ang mga kaupod kag ginhandang na ang tanan nga kinahanglanon para mapadaug ang ambus. Indi sila makalapit sa *ambush site* kon adlaw pa bangud tuman kahawan ini, gani tanan preparasyon kinahanglan himuon sa gab-i. Ginhimo ang tanan nga ini sa tunga pa sang operasyon sang kaaway. Sang nagahingapos na ang operasyon, ginhingalitan sang mga kaupod ang tuman kalip-ot nga oras halin pagtakup sang dulom tubtub alas-otso sang gab-i agud makamaniobra halin sa ila pwesto padulong sa *ambush site*.

Matapos mag-operasyon sad-tong Nobyembre 19, pauli sa kam-po ang mga suldado nga lulan sang tatlo ka salakyan-isa ka Kennedy-type nga dyip sa unahan, masunod ang isa ka Isuzu Elf, kag isa ka trak nga M35 sa ulihi. Nasakasakay diri ang halos isa ka kumpanya halin sa gintingub nga tropa sang 1st SRB kag 47th IB, labaw nga mas madamu sangsa mga kaupod nga nakadeploy para sa ambus.

Ginpalampuwas sang mga kaupod ang una nga salakyan kag gingamit ang bag-o nga himo nga bomba agud mapuruhan ang Isuzu Elf kon sa diin nakasakay ang pinakamadamu nga pwersa sang Scout Ranger. Ang mga suldado nga yara sa ulihi nga trak ang todo nakiglukpanay. Pero wala sila sang tinamaan bisan isa ka Pulang hangaway. **AB**

Sumbag sa bulan, sumbag kay Buan

Labaw nga ginapabugal ni Maj. Gen. Alphonsus Crucero, hepe sang 3rd Infantry Division (3rd ID) sang Philippine Army ang mga yunit nga ginatawag "hunter-killer" kag "taktikang ranger" nga operasyon sini. Siling niya, ginatago sang madamol nga kagulangan sang rebolusyonaryong masa ang Pulang hangaway, gani dapat kuno magpakabatid ang militar sa pagpangita (ukon pag-"hunting") kag pagpatay sa BHB.

Kon nagalunsar sang operasyon ang mga yunit nga "hunter-killer," nga ginabug-os sang mga 15-18 katawo nga hubon nga indi tuman kalayo sa kada isa. Nagahulag ini sa gab-i kag nagapakita na lamang kon nagapabalik na sa ila kampo malapit sa sentrong banwa. Pananglitan makaengkentro ini sang BHB, gilayon nga magaayuda ang mga mortar kag 105 mm *howitzer*, nga nakapuntirya na ngaa daan sa mga pili nga lugar, kag ang mga helikopter nga madasigan nga magadala sang dugang nga tropa.

Pero indi makapanago ang kaaway sa kagulangan sang masa nga ila ginapigos kag ginapintasan. Pati ang pinakahanas nila nga mga tropa indi makapangibabaw sa determinasyon kag paghiliusa sang rebolusyonaryong masa kag sang ila hangaway. Gani sa baylo nga ila makibon ang ginapangita nila nga "hayop sa kagulangan," ang mga reaksyunaryong tropa ang daw mga hayop nga nahulog sa kaugalingon nga siod.

Tuig 2001 pa ginsuguran sang 3rd ID ang mabaskog kag malaparan nga kampanya militar sa kabukiran sang Tapaz, Jamindan kag Calinog, mga lugar nga sakup sang Central Front sang BHB sa Panay.



Gintukod ang Task Force Panay agud mamuno sa pagpatuman sang kampanya nga ini. Sadto isa ka tuig lang ang gintalana sang 3rd ID para sa kampanya sini nga "ubuson ang BHB" sa Central Panay. Pero pagkatapos sang tuig 2003, pila ka adlaw antes ang pormal nga pagtapos sang programa nga ideklarar nila nga madinalag-on, napapas sang isa ka platun sang BHB ang *control center* sang RSOT sang TFP sa Daan Sur, Tapaz, Capiz.

Subong apat ka tuig na ang masingki nga kampanya militar nga ginakinaiyahan sang wala untat nga mga operasyon nga nagalab-ot sa halos duha ka operasyong batalyon kag apat ka operasyong kumpanya kada bulan. Imbolbado diri ang 12th IB, 47th IB, 32nd DRC, 33rd DRC, kag sining ulihi, ang 1st SRB nga ginapamunuan ni Lt. Col. Noel Buan. Gindala sa Panay ang 1st SRB sadtong ulihi nga bahin sang Setyembre 2005 agud pasanyugon ang kampanya sini sa katapusan nga kwarto sang tuig. Ang 1st SRB, nga may espesyal nga paghanas, daan nga nakadeploy sa Sulu. Pagkatapos ginhimo ini nga yunit pang-atake ukon "*strike force*" sang bilog nga Visayas Central Command sang AFP bangud kuno sa mataas nga lebel sang paghanas sini. Sa Visayas, gindeploy anay ang 1st SRB sa Negros kag *"Sumbag..."*, sundan sa pahina 10

Nagaluha-buwaya ang AFP

Dululungan nga nagangasal ang mga upisyal kag tagapamaba sang Armed Forces of the Philippines (AFP) para atakehon ang kuno paglapas sang Bagong Hangaway sang Banwa (BHB) sa internasyunal nga layi sang gera sang palukpan sini sang *land mine* ang komboy sang mga salakyan militar sa Calinog, Iloilo sadtong Nobyembre 19.

Wala basehan ang mga atake nga ini sang AFP batuk sa BHB. Ginatiko sang ila mga upisyal nga tagapamaba ang kaundan sang mga internasyunal nga layi sa desperado nga tuyo nga musingan ang BHB kag makuha ang simpatiya sang pumuluyo. Nagaluha-buwaya ang mga pasista. Ginapagguwa nila nga makaluluoy ang mga suldado. Pilit nila nga ginatabunan ang wala kaluoy kag wala hawid-hawid nga paggamit sang AFP sang tuman kabaskog nga mga armas nga wala pili nga nagapatay, nagahalit kag nagasabwag sang kakugmat sa pumuluyo. Lakip sa mabaskog nga hinganiban nga ini amo ang mga 105mm kanyon, mga *helicopter gunship* nga armado sang mga *rocket* kag *machinegun*, mga OV-10 bomber, mga tangke kag "*armored personnel carrier*."

Sa subong, lakip ang mga armas nga ini sa ginagamit sang AFP sa mapanghalit nga kontra-rebolusyonaryong kampanya sa pagtapna



sini sa mga prubinsya sang Quezon, Leyte, Sulu, Aurora kag iban pa nga lugar. Ginabiktima sini pangunahon ang mga indi armadong sibilyan, ila mga komunidad kag talamnan. Sini lang nga nagligad nga tatlo ka bulan, nagaabot sa 10,000 mangunguna sa Quezon kag 7,000 pamilya sa Aurora, Leyte kag Sulu ang napwersa magbiya sa ila mga puluy-an bangud sa katalagman nga tuga sang mabaskog nga armas nga ini nga lunsay ginatunod sang AFP sa mga lugar sang konsentrasyon ukon kaingod sang konsentrasyon sang mga tawo.

Hayagan nga ginalapas sang AFP ang internasyunal nga makatawong layi, pati na ang Comprehen-

sive Agreement on Respect for Human Rights and International Humanitarian Law (CARHRHIL) sa iresponsable, wala halong kag wala pili nga paggamit sini sang mabaskog nga bomba, *howitzer* kag iban pa nga hinganiban nga malaparan nagapatay kag nagahalit, nagabutang sa peligro sa kabuhi sang pumuluyo kag nagapangguba sa ila propyedad kag pangabuhian. Pila ka milyon nga inosente kag indi armado nga pumuluyo ilabi na sa kaumhan ang nahalitan kag natabog sa ila mga komunidad kag talamnan dulot sang mapintas kag wala hawid-hawid nga paggamit sang AFP sang amo nga mabaskog nga hinganiban. **AB**

"Sumbag...", halin sa pahina 9

Bohol, kon sa diin labaw nga ginkangil-aran ini sang pumuluyo bangud sa paglapas sini sa tawha-nong-kinamatarung.

Wala madugmok sang mga yunit sang kaaway ang Pulang hangaway. Sa baylo labi nga nangin

malig-on kag nag-uswag ang ikasang sang BHB sa pagpakig-away. Ang malapad nga baseng masa nga gusto dunuton sang kaaway labi pa nga nagdalom kag naglapad.

Suntok sa buwan (sumbag sa bulan) ang handum sang 3rd ID nga mapapas na nila sa maabot nga tuig ang BHB sa Central Front

sang Panay. Sumbag sa bulan ang handum nila nga dugmukon ang rebolusyonaryong determinasyon sang masa kag ila hangaway sang banwa. Sadtong gab-i sang Nobyembre 19, ang mga "espesyal" nga tropa ni Buan ang nakaagum sang mabaskog nga bunal sang put-an sila sang BHB. **AB**

Ang paggamit sang *land mine* sang hangaway sang banwa

Ang mga *land mine* ginagamit sang BHB bilang armas sa pagpasulong sang armadong rebolusyon. Kapareho sang iban pa nga mga armas sang BHB, ang paggamit sini sang mga *land mine* may tuyo kag presiso nga nakatumod sa mga armadong pwersa militar sang reaksyunaryong gubyerno, sa ila mga tinawo, salakyan kag iban pa nga kagamitan. Ginagamit ang mga ini pangunahon sa mga taktikal nga opensiba.

Ginabilang sang hangaway ang mga *land mine* nga dugang nga hinganiban agud pangibabawan ang kakulangan kag relatibo nga kahinaan sang mga armas sini kumpara sa kadamuon kag kabaskog sang mga hinganiban nga yara kamot sang pa-sistang kaaway.

Ang mga polisiya sang BHB sa paggamit sang *land mine* lunsay nakasandig sa mga nagaluntad nga internasyunal nga layi para sa makatawo nga kondukta sang gera. Ang mga ini nagasanto, sa partikular, sa mga probisyon sang Ottawa Treaty, nga amo ang solo nga internasyunal nga layi nahanungod sa *land mine*. Ang Ottawa Treaty nagadumili sa paggamit, produksyon kag pagtago sang mga "*anti-personnel mine*"-nga nagatumod sa bomba nga nagalupok kon nahulag ukon bisan malapitan lang sang biktima. Partikular nga katuyuan sang Ottawa Treaty nga untaton ang mga kahalitan nga ginatuga sa mga sibilyan sang mga *land mine* nga ginlubong kag iresponsable nga ginbayaan sa indi markado nga mga lugar. (Ang Ottawa Treaty, nga ginpirmahan sa Ottawa, Canada sadtong 1997 ginakilala sang gubyerno sang Pilipinas. Ginabalibaran nga kilalahon sang US, Russia kag China, nga lakip sa pinakadaku magmanupaktura sang *land mine*.)

Ang paggamit sang BHB sa ano



man nga armas nga kapot sini balis-kad sa paggamit sang AFP sa ila mga armas. Mahalong kag responsable nga ginagamit sang BHB ang mga *land mine* bilang lehitimo nga mga hinganiban panggera batuk sa mga pili nga target militar. Ang paggamit sang BHB sang mga *land mine* pareho man sang mahalong kag responsable nga paggamit sini sang mga riple kag iban pa nga magagmay nga armas sini. Kada isa sini may pat-ud nga target. Depende sa target, sukat kag tama-tama nga kusog ang kabaskog sang kada ginabutang nga *land mine*. Hugot nga ginahalungan kag ginabantayan ang mga ini agud pat-uron indi aksidente nga magalupok kag makabiktima sang mga sibilyan.

"*Command-detonated*" ang klase sang *land mine* nga ginagamit sang BHB. Ang mga ini direkta nga ginakontrol kag ginapalupok lang kon ang partikular nga target militar malapit na. Matapos ilubong, maid-id nga ginabantayan sang mga hangaway sang BHB ang mga *land mine*. Indi maglupok ini kon matapakan,

makaptan sang tawo ukon bisan ag-yan pa sang iban nga salakyan. Luwas sa ginapat-ud nga may pili nga target ang mga ini, ginapat-ud man nga ang mga *land mine* may nagakagigo lang nga kusog kag indi magtuga sang sobra-sobra nga kahalitan batuk sa mga target sini. Kon wala sang gilayon nga target, ang mga ini gilayon nga ginakuha.

Padayon nga pagagamiton sang BHB ang mga *land mine* bilang lehitimo nga hinganiban panggera. Sa paggamit sang mga ini kag iban pa nga armas, ang BHB muklat nga ginaubayan sang mga internasyunal nga layi kag kumbensyon para sa sibilisado nga kondukto sang gera. Kadungan sini, pagagamiton sang BHB kag pumuluwong Pilipino ang tanan nga posible kag ginapahanugutan nga armas, daan man ukon moderno, agud pabaskugon ang armadong rebolusyon. Samtang nagasulong ang inaway banwa, magadamu pa ang mga klase kag numero sang mga armas nga pagagamiton sang pumuluwo kag ila hangaway agud lutuson kag papason ang kaaway. AB

Padayon ang pagpaniplang kag maniobra sang rehimeng Arroyo

Ang pagbalik kag pagbinutig ni Garci

Makaligad ang halos lima ka bulan nga pagpanago, ginpatuhaw na sang rehimeng Arroyo si anay COMELEC Commissioner Virgilio Garcillano sining Nobyembre 27 para magsabwag sang dugang nga kabutigan, limpyuhon ang iya ngalan, kag sa proseso, ang ngalan sang iya amo nga si Gloria Arroyo. Sa pagpatuhaw kay Garcillano, tuyo ni Arroyo nga "isara" ang isyu sang "Hello Garci tapes" nga padayon nagamulto sa iya pagginahum.

Ang pagpatuhaw kay Garcillano kabahin lang sang padayon nga pagtinguha sang rehimen nga tip-langon ang pumuluyo kag idiskaril ang kahublagan sa pagpatalsik kay Arroyo.

Pareho sang ginalauman, ang ginpahayag niya nga panindugan wala sing kinalain sa daan na nga ginapamilit nga linya nga "wala sang dinayaay" sadtong eleksyon 2004. Ginkumpirma ni Garcillano nga nasugilanon niya si Gloria Arroyo pero siling niya wala sang iligal ukon imoral bahin diri. Walay huya nga ginlarawan niya ang kagalingon bilang biktima sang *wire-tapping* sa desperasyon nga makuha ang simpatiya sang publiko. Pero gilayon niya nga ginbawi ini sa pagsiling nga indi tunay ang mga *tape* kag ang mga ini ginputol-putol kag ginmanipula para samaron siya kag ibagsak si Arroyo. Subong pa lang ginasiling na sang iya abugado nga wala siya sang ano man nga igabuyagyag bahin sa Gloria-Garci *tape*.

Malaut pa, gusto nga gamiton sang rehimen ang mga pagbista sa Kongreso para baliskaron ang sitwasyon kag atakehon ang oposisyon paagi sang mga bag-o nga

pagbinutig ni Garcillano. Agud tabunan ang isyu sang pagsugilanon nila ni Arroyo, ginpauna na niya nga "ibuyagyag ang tanan nga nasugilanon niya sa madamo pa nga pulitiko." Lakip sa mga ginhingadlan niya ang mga kongresista nga nagapursiger sa kasong *impeachment* batuk kay Arroyo sadtong Septyembre. Mabaskog nga ginahimutig sang nasambit nga mga kongresista ang mga akusasyon ni Zuce kag Capt. Marlon Mendoza, mga nagserbi nga opereytor ni Garcillano sa pagdinaya, inakusahan man niya nga nagabinutig ang mga ini kag sa aktwal sila kuno ang mga opereytor sa pagdinaya sa Mindanao.

Ginbuhi sang pagbuyagyag ni Garcillano ang imbestigasyon sa Kongreso kag Senado ang interes diri sang pumuluyo. Ang hayagan nga pagbinutig nga himuon niya sa pagtestigo sa Kongreso pat-ud nga magpasantik liwat sang kaakig kag paghulag sang pumuluyo.

Nakalkal man sini ang mga ginhimo nga maniobra sang rehimen sadtong Hunyo agud itago siya sa mata sang publiko. Indi mag-

kalaamo subong ang nagkalain-lain nga estorya ni Garcillano kaangot sang iya pagtago sining nagligad nga mga bulan.

Antes magtungang si Garcillano, nabuyagyag nga nakigkit siya kay Mike Arroyo, pila ka kongresista kag lokal nga upisyal nga maki-Arroyo sa Zamboanga sadtong Nobyembre 23. Mismo sanday Ronaldo Puno kag Prospero Pichay, mga pangunahon nga opereytor ni Arroyo sa Kongreso, ang ginreport nga nagbalay sang iya pahayag kag nag-

areglo sang iya pag-atubang sa pila ka pili nga reporter. Hungod nga gindungan ang iya pagtungang sa nakatalana nga pagbilog sang mga resulta sang Citizens' Congress for Truth and Accountability (CCTA).

Antes pa man ginpatuhaw si Garcillano, ginpat-ud sang rehimen nga nabayluhan na sang mga maki-Arroyo nga kongresista ang mga pamunuan sang mga komite nga nagahimo sang imbestigasyon. Suno sa abugado ni Garcillano, sa Kongreso lang maatubang si Garcillano kag indi sa Senado kon sa diin indi masiguro nga pagadampigan siya sang mayorya sang mga senador.

Pagbalasa sa kabinete kag pagtalana sang mga bag-ong upisyal

Bilang bahin sang nagapadayon nga pagtinguha ni Arroyo nga konsolidahon ang iya ginatay-og nga base sang gahum, ginabalasa niya subong ang iya kabinete agud hatagan sang mas prominente kag makagagahum nga mga pwesto ang

"Garci...", sundan sa pahina 13

Abono sa kampanya ni Arroyo



"Ni isa sa mga mangu-
nguma sa 64 nga tsap-
ter namon wala naka-
baton bisan gamay halin sa
mga pondo nga ini. Ang abono
para sa ma-

ngunguma nangin abono para sa kampanya (sang ad-
ministrasyon) sadtong eleksyon." Ini ang pahayag ni
Danilo Ramos, lider sang Kilusang Magbubukid ng Pili-
pinas, sang magtestigo siya sa pagbista sang Senado
kag pagkatapos sa Citizens' Congress for Truth and
Accountability (CCTA). Nabuyagyag sa pagbista sang
Senado kag CCTA nga halos tanan sang P2.8 bilyones
nga pondo para sa Ginintuang Masaganang Ani (GMA),
isa kuno ka programa para sa pagpauswag sang agri-
kultura kag libre nga pagpanagtag sang abono sa mga
mangunguma nga ginadumalahan sang Department of
Agriculture (DA), wala nila mabaton sa porma man ini
sang kwarta, abono ukon ano man. Sa baylo, ang pon-
do sadtong panahon sang eleksyon nagkadto sa mga
puno nga opereytor, tagadumala sang kampanya kag
mga kaalyado nga kongresman kag lokal nga upisyales

"Abono...", sundan sa pahina 14

"Garci...", halin sa pahina 12

pinakatampad kag pinakamapusla-
non niya nga mga suluguon.

Gintalana ni Arroyo sining Dis-
yembre sa Office of the Om-
budsman si Merceditas Gutierrez,
anay hepe nga abugado sang Mala-
kanyang kag kilala nga suod nga
abyan kag suporter sang pamilya
Arroyo. Ginbayluhan niya si Simeon
Marcelo bilang *ombudsman* makali-
gad magbiya sa pwesto sang
nagmandu si Arroyo nga aregluhon
ang kaso nga korapsyon nga napa-
saka batuk kay anay Justice Secre-
tary Hernando Perez.

Antes ini, nagtukod si Arroyo
sang bag-o nga upisina nga ang ul-
timo nga trabaho amo nga paha-
muton siya sa publiko, takpan ang
iya mga kahinaan kag ipamilit ang
iya kontra-pumuluyo nga polisiya
paagi sang mga "kampanya nga im-
pormasyon". Ginbansagan ini nga
Presidential Communications Group
kag gintalana nga magadumala sa
tanang mga pagpakig-angot
sang rehimen sa midya kag publi-
ko. Gintalana nga pinuno sini si
Sec. Ignacio Bunye, anay Press
Secretary, kag ginhinguyangan

sang daku nga pondo.

Ginaplano ni Arroyo nga ipwes-
to sa Department of Interior and
Local Government (DILG) si Rep.
Ronaldo Puno. Si Puno ginasisa-
hum nga utok kag *political strate-
gist* ni Arroyo sadtong eleksyon
kag sining ulihi, sa pagmaniobra
agud patyon ang kasong *impe-
achment* sa Kongreso. Direkta niya
nga kapot ang pondo nga pagsuhol
sa mga lokal nga upisyal gani sa
ang pagtugyan sa iya sang DILG
pagpormalisa lang sa daan niya
nga papel bilang "tagaareglo" sa
mga lokal nga upisyal sang gub-
yerno. Amo man, si Puno ang gina-
kilala nga tagadumala sang mahig-
ko nga taktika para sa rehimen, ka-
tuwang ni Mike Arroyo kag Sec.
Gabriel Claudio.

Nagapadayon nga paghulag

Sadtong Nobyembre 25, nag-
lunsar ang White Ribbon Move-
ment sang misa sa sulod sang San
Miguel Church malapit sa Malakan-
yang bilang direkta nga paghang-
kat sa pagdumili ni Arroyo sang
ano man nga pagtilipon sa palibot
sang palasyo. Nag-abot sa 500 ang
nagtambong sa misa nga nagmar-

tsa pagguwa sang simbahan kon sa
diin nagsug-alaw ang pila ka libo
pa nga aktibista kag pumuluyo. Gi-
layon nga ginpunggan kag ginpali-
butan sang mga elemento sang
Presidential Security Group ang
mga nagmartsa. Sining Nobyembre
30, kadungan sa pagselebrar sa
ika-142 nga anibersaryo sang pag-
kabun-ag ni Andres Bonifacio,
naghiwat sang paghulag ang libu-
libo nga mamumugon sa Plaza Mi-
randa agud ipanawagan ang pagta-
as sang sweldo kag pagpatalsik kay
Arroyo.

Samtang, gindeklarar na sang
Black and White Movement (BWM)
sining Disyembre 1 nga igakampa-
nya na nila ang dungan nga pag-
patalsik kanday Arroyo kag Bise
Presidente Noli de Castro. Ini ma-
kaligad balewalaon ni de Castro
ang gintalana nga adlaw sa iya nga
talikdan ang rehimen kabaylo sang
pagbaton sa iya bilang lehitimo
nga kabulos ni Arroyo. Ang BWM
amo ang grupo sang mga nahanu-
nga nga pwersa nga ginapanguna-
han sang mga nagbiya nga upisyal
sang rehimen pareho ni anay So-
cial Welfare Secretary Dinky Soli-
man.

AB

"Abono...", *halin sa pahina 13*

ni Arroyo.

Suno sa Commission on Audit (COA), 104 kongresista, 46 gobernador kag 34 meyor ang nagbaton sang pondo. Baraghal ang korapsyon nga ini bangud pati upisyales sa mga distrito sang mga syudad nga wala sang duta nga agrikultural pareho sang mga syudad sa Metro Manila nakabaton kuno sang pondo para sa abono. Mabaskog nga ginapaningwala sang mga kongresista nga nakabaton sila sang amo nga pondo.

Suno man sa COA, ang aktwal nga natapos lang nila maawdit amo ang mga pondo nga ginhatag sa Bicol kag Central Visayas. Ang kadam-an sa ginpanagtag nga pondo wala na nila naawddit bangud nagagi ang mga ini sa 15 pribadong "NGO" ("*non-governmental organization*," nga ginagamit sang Malakanyang para pangprente sa mga katuntuhan) nga indi na nila sakup. Masobra P120 bilyones ang nagagi sa mga "NGO" nga ini. Pila diri ang Gabay Masa Development Foundation Inc., Peoples' Organization for Progress and Development Foundation Inc. (POPDI), Magsasaka Foundation Inc., Philippine Social Development Foundation, Inc., Ma-

tatag na Republika Cooperative, Ikaw at Ako Foundation-mga bogus nga organisasyon nga gintukod ni National Security Adviser Norberto Gonzales para lang himuon nga alagyan sang dalagkuan nga pagpamuyong sa pondo sang gubyerno.

Tanan nga rehiyon kag syudad nga napaidalum sa awditing nagabalibad nga may nabaton sila nga pondo nga ginreport nga nagkadto sa ila para sa abono kag ginpaagi sa nasambit nga mga NGO.

Luwas sa dalagku nga kantidad nga indi mapaathag kon sa diin nagkadto ang kadam-an kag kon sa diin gamay ang nabakal nga abono, nabuyagyag naman nga may 30% komisyon sa minimum (may iban nga nagapangayo pa sang 75%) para sa mga kongresman halin sa mga suplayer sang abono. Sobra-sobra man ang patong nga presyo sang mga ginbakal nga abono (minimum nga 800% tubtub 1,300% ukon masobra pa) kag gamay kon indi man wala sang abono nga ginpanagtag sa mga mangunguma.

May mga paltik nga report nga nagalista sang mga indi mapatihan nga suplayer sang abono, pareho sang isa ka gamay nga tindahan sang utanon sa merkado sang Calo-

ocan City nga kuno suplayer sang abono para sa Eastern Samar. Mada-mo man paltik nga report nga nagalista sang mga nahatagan kuno sang abono nga wala naman matuod nga ginpanghatag. May mga kaso pa nga ang abono kuno nga ginpanagtag sa mga mangunguma sang humay para sa mga orkids lang dapat.

Mayor nga direktang imbolbado sa kaso sang anomalya sa abono amo si DA Undersecretary Jocelyn "Jocjoc" Bolante nga gilayon ginpapalagyo sang Malakanyang para indi maimbestigar sang Senado. Si Bolante kilala nga malapit nga tinawo ni Mike Arroyo. Samtang, wala man nagpakita sa imbestigasyon sa Senado ang anay sekretaryo sang DA nga si Cito Lorenzo nga naghatag sang awtorisasyon kay Bolante.

Sa testimonya sang nagbiya nga Budget Secretary Emilia Boncodin, gindali-dali ni Arroyo ang pag-aprubar kag paghatag sang pondo para sa abono bisan indi pa kumpleto ang papeles sang mga ini. Wala man nasunod ang mga proseso sa pagpagguwa sang pondo sa mga upisyal gani mabudlay tumuron ang mga ginasingling nga organisasyon sang mga mangunguma nga nakakuha sang abono ukon pondo. **AB**

Paglakip sang EU sa PKP kag BHB sa listahan sang mga terorista, ginkundenar sang NDFP

GINKUNDENAR sang National Democratic Front of the Philippines (NDFP) ang Council of the European Union (CEU) sa ginasingling sini nga indi matarung kag malisyoso nga paglakip liwat sa Partido Komunista sang Pilipinas (PKP), Bag-ong Hangaway sang Banwa (BHB) kag *senior political consultant* sang NDFP nga si Jose Maria Sison sa listahan sang mga "terorista." Sa isa ka pahayag sining Disyembre 3, ginsiling man ni Luis Jalandoni, tagapangulo sang NDFP Negotiating Panel, nga ang tikang

sang CEU pagpahilabot sa pangsulod nga hambalanon sang Pilipinas.

Dugang pa niya, ang paglista liw-as sa mga prinsipyo nga nakasagad sa 1997 Protocol 1 Additional to the 1949 Geneva Conventions, 1948 Universal Declaration of Human Rights and Political Rights kag sa 1966 International Covenant on Civil and Political Rights. Ginlapas man sini ang 1950 European Convention of Human Rights and Fundamental Freedoms, ang 1957 Refugee Convention kag ang 2000 Char-

ter of Fundamental Rights of the European Union.

Ginathag ni Jalandoni nga ang rebolusyunaryo nga kahublagan nga ginapamunuan sang PKP isa ka pungsodnon nga kahublagan nga mapagpahilway kag ang pagamit sini sang armado nga pwersa para mag-agom sang pampulitika nga mga katuyuan ginakilala nga lehitimo sa pangakalibutanon nga layi. Kon amo, siling ni Jalandoni, indi dapat ilakip ang PKP, BHB kag si Kaupod Sison sa mga terorista.


**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVI No. 23
Disyembre 7, 2005
www.philippinerevolution.org

Editorial

Pamatukan ang wala untat nga kalakasan sang rehimeng Arroyo



Wala untat ang kalakasan sang pasista nga sapat nga si Gloria Arroyo. Sa kadamuon, kasunson kag brutalidad sang mga pagpamatay sa mga lider kag katapu sang mga progresibong organisasyon kag

sa kalapad kag kasingkion sang pagpang-abuso sa tawhanong-kinamatarung sang ordinario nga pumuluyo, ginapaluntad niya ang kagugmat sang indi pagdeklarar sang layi militar. Ginatapna ang ano man nga pagpamatuk sa iya pagginahum, kag ano man nga paginsister sa kinamatarung sa atubang sang mapiguson nga mga polisiya ginalupig sang kamot nga salsalon.

Daw buhi ang ginakangil-aran nga pasistang diktador nga si Marcos sa persona ni Arroyo. Kon usisaon, halos nalampasan na sang paltik nga presidente ang nagtaliwan nga diktador sa kapintas.

Sa idalum sang diktaduryang Marcos, napuno ang mga presohan sang linibu-libo nga bilanggo pulitikal. Sa idalum sang rehimeng Arroyo, madamo gihapon ang ginahunong, pero mas madamo ang wala kaluoy nga ginapamatay.

Daw "indi magkuha sang bihag!" ang polisiya ni Arroyo sa pagpapas sa ginabilang niya mga "kaaway." Ginapadalagan sang AFP ang *death squad* sa nagkalain-lain nga bahin sang pungsod kag ginakasangkapan ang mga ini sa kampanya sang pangpulitika nga asasinasyon.

Ang mga pagpamatay kag pagpang-ipit sa mga sibilyan masami nga balos sang AFP kag PNP sa mga kasamaran nga naangkon nila sa kamot sang BHB kag sa ka-

**Mga tampok
sa isyu nga ini...**

Report bahin sa pag-
lapas sa tawhanong-
kinamatarung PAHINA 3

Mga engkwentro
sa Quezon PAHINA 7

Ang paggamit sg *land
mine* sg hangaway sg
banwa PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*